



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10) Skupština Brčko distrikta BiH, na 30. redovnoj sjednici održanoj 7. septembra 2022. godine, usvaja

ZAKON
O IZMJENAMA I DOPUNAMA ZAKONA O PRAVNIM LICIMA KOJE
OSNIVA BRČKO DISTRIKT

Član 1

U Zakonu o pravnim licima koje osniva Brčko distrikt (Službeni glasnik Brčko distrikta BiH, brojevi: 10/02, 19/07, 2/08, 3/19, 30/20 i 10/22), u članu 10 stav 2 mijenja se i glasi:

„Članove upravnog odbora imenuje i razrješava Vlada“.

U stavu 5 ovog člana tačka c) mijenja se i glasi:

„c) najmanje pet godina radnog iskustva nakon sticanja visoke stručne spreme.“

U stavu 8 ovog člana riječ „Statutom“ zamjenjuje se riječima „osnivačkim aktom“.

Član 2

Član 10a mijenja se i glasi:

„Član 10a

Izbor kandidata za članove upravnog odbora pravnog lica vrši petočlana komisija sastavljena od državnih službenika zaposlenih u organima javne uprave i koja odražava sastav stanovništva.

Komisija ima zapisničara iz reda državnih službenika zaposlenih u organima javne uprave koji nije član komisije.

Članove komisije i zapisničara iz stavova 1 i 2 ovog člana imenuje gradonačelnik Brčko distrikta BiH na prijedlog odjeljenja nadležnog za oblast djelatnosti koju obavlja pravno lice.

Gradonačelnik, putem komisije iz stava 1 ovog člana, raspisuje javni konkurs za izbor i imenovanje članova upravnog odbora koji se objavljuje na zvaničnoj internet stranici Vlade Brčko distrikta BiH i pravnog lica i otvoren je petnaest (15) dana od dana objavljivanja javnog konkursa.

Članovi upravnog odbora biraju se na osnovu uslova propisanih članom 12 ovog zakona i profesionalnih sposobnosti te odražavaju sastav stanovništva Brčko distrikta BiH.

Komisija utvrđuje da li svi kandidati ispunjavaju uslove konkursa, zakazuje intervju, intervjuiše i ocjenjuje kandidate, te utvrđuje rang-listu kandidata koju dostavlja gradonačelniku i šefu odjeljenja nadležnog za oblast djelatnosti koju obavlja pravno lice.

Odjeljenje nadležno za oblast djelatnosti koju obavlja pravno lice, u skladu s rang-listom kandidata, kandiduje odluku o imenovanju članova upravnog odbora pravnog lica na sjednicu Vlade radi usvajanja.

Odluka o imenovanju članova upravnog odbora pravnog lica je konačna i protiv nje se može pokrenuti upravni spor.

Rok za provođenje postupka izbora članova upravnog odbora pravnog lica i donošenje odluke o imenovanju članova upravnog odbora pravnog lica je trideset (30) dana od dana zatvaranja javnog konkursa.

Odluka o imenovanju članova upravnog odbora pravnog lica objavljuje se u Službenom glasniku Brčko distrikta Bosne i Hercegovine.

Postupak izbora članova upravnog odbora pravnog lica mora biti okončan prije isteka mandata dotadašnjim članovima upravnog odbora.

Član 3

U članu 13, riječ: „Statutom“, zamjenjuje se riječima: „osnivačkim aktom“.

Član 4

U članu 14, riječi: „Skupština Brčko distrikta BiH“, zamjenjuje se riječju: „Vlada“.

Član 5

Iza člana 23 dodaje se novi član 23a koji glasi:

„Član 23a

„Ukoliko osnovano pravno lice vrši javne poslove iz nadležnosti odjeljenja Vlade, usljed čega je došlo do reorganizacije odjeljenja i ukidanja pojedinih organizacionih jedinica odjeljenja te posljedično prekobrojnosti zaposlenika zaposlenih u organizacionoj jedinici odjeljenja, osnovano pravno lice odlukom Vlade, a na prijedlog odjeljenja nadležnog za oblast djelatnosti koju obavlja pravno lice, preuzima i raspoređuje prekobrojne zaposlenike odjeljenja, uz njihov pristanak, a čija su radna mjesta u ukinutoj organizacionoj jedinici odjeljenja istovjetna s radnim mjestima u pravnom licu ili u cijelosti odgovaraju minimalnim uslovima radnog mjesta u pravnom licu, a u skladu s organizacionim planom odjeljenja i relevantnim aktom kojim se reguliše unutrašnja organizacija i sistematizacija radnih mjesta u pravnom licu.“

Član 6

Ovaj zakon stupa na snagu osmog (8.) dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-4053/22

Brčko, 7. 9. 2022. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić